

Na osnovu člana 13. Zakona o principima lokalne samouprave Federacije Bosne i Hercegovine ("Službene novine Federacije BiH", broj 49/06), člana 53. Zakona o sportu ("Službene novine Kantona Sarajevo, br. 45/12 (prečišćen tekst), člana 10., 12., 25. Statuta Općine Stari Grad Sarajevo, prečišćeni tekst ("Službene novine Kantona Sarajevo", broj: 20/13), na 29. sjednici održanoj dana 27. 06. 2019. godine, Općinsko vijeće Općine Stari Grad Sarajevo, donosi:

PRAVILNIK
o stipendiranju nadarenih
sportista/sportistkinja - učenika osnovnog i
srednjeg obrazovanja sa područja Općine
Stari Grad Sarajevo

I. OSNOVNE ODREDBE

Član 1.

- (1) Ovim Pravilnikom utvrđuju se osnove, način i kriteriji stipendiranja nadarenih sportista/sportistkinja - učenika osnovnog i srednjeg obrazovanja koji postižu vrhunske sportske rezultate na domaćim i međunarodnim takmičenjima, a imaju prebivalište na području Općine Stari Grad Sarajevo (u daljem tekstu Općina).

Član 2.

- (1) Općina će u toku jedne Budžetske godine dodijeliti sportske stipendije za učenike osnovnog i srednjeg obrazovanja koji postižu vrhunske sportske rezultate na domaćim i međunarodnim takmičenjima (u daljem tekstu sportisti/sportistkinje), a sve shodno raspoloživim finansijskim sredstvima.
- (2) Sredstva za stipendiranje nadarenih sportista/sportistkinja – učenika osnovnog i srednjeg obrazovanja obezbijavaju se u Budžetu Općine.

Član 3.

- (1) Općinsko vijeće na prijedlog Općinskog načelnika donosi Plan stipendiranja nadarenih sportista/sportistkinja - učenika osnovnog i srednjeg obrazovanja za prethodnu kalendarsku godinu, a sve shodno potrebama i raspoloživim finansijskim sredstvima utvrđenim prijedlogom Budžeta za godinu za koju se plan i donosi.

Član 4.

- (1) Plan iz člana 3. ovog Pravilnika provodi Općinski načelnik, a isplata stipendija precizira se Ugovorom o stipendiranju

Član 5.

(1) Stipendije se dodjeljuju za rezultate postignute u prethodnoj kalendarskoj godini.

II KONKURS

Član 6.

- (1) Stipendije se dodjeljuju na osnovu provedenog javnog poziva za izbor kandidata za dodjelu stipendija nadarenim sportistima/sportistkinjama - učenicima osnovnog i srednjeg obrazovanja Općine Stari Grad.
- (2) Konkurs raspisuje Općinski načelnik putem nadležne Službe, a objavljuje se u jednom od dnevnih listova, web stranici Općine Stari Grad te Oglasnoj ploči Općine. Konkurs ostaje otvoren 15 dana od dana objavljivanja.

(3) Konkurs sadrži:

- opće uslove i kriterije za dodjelu stipendije,
- visinu i broj stipendija koje se dodjeljuju,
- naziv i adresu tijela kojom se prijave podnose,
- rok za podnošenje prijave,
- rok za objavljivanje rezultata konkursa,
- popis dokumenata koje je potrebno priložiti uz prijavu,
- druge potrebne podatke od značaja za uredno provođenje konkursa.

II. PRAVO UČEŠĆA NA KONKURSU

Član 7.

(1) Pravo učešća na konkursu za dodjelu stipendija ima nadareni sportista/sportistkinja koji ispunjavaju sljedeće uslove:

- da je državljanin BiH,
- da ima prebivalište na području Općine najmanje pet godina prije objave konkursa,
- da ima navršenih 10 godina života,
- da je član kluba koji je registrovan za takmičenje u zvaničnom strukovnom sportskom savezu Bosne i Hercegovine.

(2) Pravo na dodjelu stipendija nema učenik osnovnog i srednjeg obrazovanja koji prima stipendiju po istom osnovu.

III. PRIJAVA NA KONKURSU

Član 8.

- (1) Nadareni sportista/sportistkinja podnosi prijavu na objavljeni konkurs.
- (2) Uz prijavu je potrebno priložiti sljedeće dokumente:

- prijavni obrazac za osnovnim podacima: adresa, broj telefona, e-mail adresa
 - izjavu da kandidat ne prima stipendiju po istom osnovu ovjerenu od općinskog organa uprave (dostavlja se nakon objavljene konačne rang liste, a prije potpisivanja ugovora),
 - potvrda o redovnom školovanju,
 - uvjerenje o državljanstvu,
 - uvjerenje o kretanju ne starije od 30 dana,
 - potvrdu zvaničnog strukovnog sportskog saveza o postignutim sportskim rezultatima podnosioca prijave za prošlu kalendarsku godinu, kako na domaćim tako i na međunarodnim takmičenjima,
- (3) Dokumenti se prilažu u originalu ili ovjerenj kopiji.

IV. KRITERIJI ZA IZBOR KANDIDATA

Član 9.

(1) Utvrđivanje rang liste kandidata za dodjelu stipendija vrši se na osnovu ostvarenih sportskih rezultata u pojedinačnoj i ekipnoj konkurenciji na državnim prvenstvima i međunarodnim takmičenjima priznatim od svjetskih i evropskih federacija, a vrednuju se rezultati ostvareni u prošloj kalendarskoj godini, i to:

- učešće na Olimpijskim i paraolimpijskim igrama
- učešće na Univerzijadi
- osvojeno 1., 2. I 3. Mjesto na svjetskim prvenstvima i kupovima, evropskim prvenstvima i kupovima, Mediteranskim igrama,
- osvojeno 1., 2. I 3 mjesto na državnom prvenstvu.

(2) Vrednovanje rezultata vršit će se na osnovu zvanične potvrde o ostvarenom rezultatu u prethodnoj godini, koju izdaje zvanični strukovni sportski savez kod kojeg je kandidat registrovan za takmičenje.

Rezultati se vrednuju prema sljedećoj BODOVNOJ TABLICI:

Naziv sportskog takmičenja	POJEDINAČNA TAKMIČENJA				EKIPNA TAKMIČENJA			
	I mjesto	II mjesto	III mjesto	1 kolo	I mjesto	II mjesto	III mjesto	1 kolo
Olimpijske i paraolimpijske igre	-	-	-	150	-	-	-	150
Univerzijada	-	-	-	100	-	-	-	100
Svjetsko prvenstvo i Svjetski kup	150	100	80	50	150	100	80	50
Evropsko prvenstvo i Evropski kup	120	90	80	50	120	90	80	50
Evropske lige	120	90	80	50	120	90	80	50
Mediteranske igre	100	70	50	-	100	70	50	-
Državno prvenstvo	50	30	20	-	50	30	20	-

- (3) Vrednovanje rezultata vrši se tako što se boduje najbolji aktuelni rezultat takmičara.
- (4) Ukoliko je takmičar postigao više rezultata na jednom takmičenju bodovat će se samo jedan najbolji rezultat.
- (5) Ukoliko dva kandidata imaju isti broj bodova nakon bodovanja najboljeg aktuelnog rezultata rangiranje se vrši na osnovu drugog postignutog rezultata, sve dok se ne utvrdi razlika u bodovima.
- (6) Takmičarima iz matičnih sportskih saveza koji nemaju jedinstvenu međunarodnu federaciju, broj bodova za plasmane na međunarodnim takmičenjima umanjuju se za 50%.
- (7) Rezultati u neolimpijskim sportovima vrednuju se sa 50 % bodova manje u odnosu na olimpijske sportove.
- (8) Za takmičare iz jedne sportske discipline može biti dodijeljeno najviše 10% sredstava namijenjenih za stipendije.

- (9) Ako se iz određenog razloga se ne prijavi dovoljan broj kandidata koji ispunjavaju uslove za određene sportove, Komisija zadržava pravo da uz saglasnost Načelnika navedena sredstva preusmjeri na ostale kandidate kako bi se planirana sredstva iskoristila.

V. POSTUPAK DODJELE STIPENDIJA

Član 10.

- (1) Općinski načelnik imenuje komisiju za dodjelu stipendija (u daljem tekstu: Komisija). Komisija se sastoji od 5 članova: 2 predstavnika nadležne Službe, te 3 predstavnika Općinskog Vijeća.
- (2) Zadaci Komisije su: pregled prispjelih prijava i dokumentacije, utvrđivanje rang liste po objavljenom konkursu za dodjelu stipendija učenicima osnovnog i srednjeg obrazovanja - sportistima sa područja Općine, a na osnovu utvrđenih kriterija iz člana 6. ovog pravilnika.
- (3) Komisija uz suglasnost Općinskog načelnika objavljuje preliminarnu rang listu kandidata koji su dobili stipendiju na Oglasnoj ploči i web stranici Općine.
- (4) Svaki učesnik u Konkursu može u roku od 8 dana od objavljivanja rang liste podnijeti prigovor za zaštitu prava Drugostepenoj stručnoj komisiji Općinskog vijeća koja donosi konačnu odluku po prigovoru.

Član 11.

- (1) Na osnovu pravosnažno okončanog postupka po prigovorima, Komisija uz suglasnost Općinskog načelnika objavljuje konačnu rang listu kandidata.
- (2) Sa izabranim kandidatom zaključuje se ugovor o dodjeli stipendije kojim se regulišu međusobna prava i obaveze nadarenih sportista/sportistkinja - učenika osnovnog i srednjeg obrazovanja.
- (3) Općinski načelnik sklapa ugovor s korisnikom stipendije.
- (4) Ukoliko je korisnik stipendije maloljetan, u njegovo ime ugovor sklapa zakonski zastupnik (roditelj ili staratelj).

VI. PRAVA I OBAVEZE KORISNIKA I DAVAOCA STIPENDIJE

Član 12.

- (1) Stipendije se dodjeljuju za jednu kalendarsku/budžetsku godinu i isplaćuju se 12 mjeseci, iste se po utvrđenom Planu stipendiranja nadarenih sportista/sportistkinja - učenika osnovnog i srednjeg obrazovanja, procentualno raspoređuju i obezbjeđuju u Budžetu Općine Stari Grad.
- (2) Ukupna sredstva potrebna za stipendiranje procentualno se dodjeljuju za:

- Učenike osnovnog obrazovanja – sportiste – 40%.
- Učenike srednjeg obrazovanja – sportiste – 60%.

- (3) Ukoliko se iz određenog razloga ne prijavi dovoljan broj kandidata, Komisija zadržava pravo uz saglasnost Načelnika, da navedena sredstva preusmjeri na ostale kandidate kako bi se planirana sredstva iskoristila.
- (4) Stipendije na mjesečnom nivou iznose 50,00 KM za učenike osnovnih škola te 70,00 KM za učenike srednjih škola.

Član 13.

- (1) Korisniku stipendije, koji je potpisnik ugovora o stipendiranju, bit će obustavljena dalja isplata stipendije i Ugovor će biti raskinut ukoliko se utvrdi da korisnik stipendije Općine Stari Grad koristi stipendiju po istom osnovu izuzev stipendije od strane Olimpijskog komiteta BiH.
- (2) U slučajevima predviđenim u stavu (1) ovog člana, potpisnik Ugovora o stipendiranju dužan je izvršiti povrat do tada primljenih sredstava od Općine Stari Grad u roku od 30 dana od dana raskida ugovora.

VII. PRELAZNE I ZAVRŠNE ODREDBE

Član 14.

- (1) Ovaj Pravilnik stupa na snagu osmog dana od dana objave u Službenim novinama KS.

Predsjedavajući Općinskog vijeća
Stari Grad Sarajevo
Samir Muhić

Broj:
Sarajevo, _____ 2019.

OBRAZLOŽENJE

Pravni osnov za donošenje:

Pravni osnov za donošenje Pravilnika sadržan je u preambuli akta.

Razlozi za donošenje:

Svrha donošenja ovog Pravilnika je namjera Općine da se na ovaj način da potpora **mladim nadarenim sportistima/sportistkinjama - učenicima osnovnog i srednjeg obrazovanja**, koji su stanovnici Općine Stari Grad. Jako je bitno da se ovoj uzrasnoj kategoriji da motiv za još aktivnijim bavljenjem sportom. Prema našem iskustvu, puno je lakše trenirati, boriti se na takmičenjima za bolji rezultat, ako imate određena finansijska sredstva na raspolaganju, sredstva koja zavise isključivo od vašeg sportskog uspjeha i rezultata. Vrhunski sportisti zahtjevaju poseban režim ishrane, opremu i kontinuiranu pripremu, što zahtjeva dodatna novčana izlaganja. Mišljenja smo da će ta stipendija mladim ljudima dati podstrek za njihov aktivniji angažman u sportskim aktivnostima.

Također, smatramo da uvođenjem ovih stipendija Budžet Općine se neće dodatno opteretiti, jer će se isključiti mogućnost podnošenja pojedinačnih zahtjeva po istom osnovu. Tim će se i sistemski riješiti ta vrsta problema na koje smo u svom radu nailazili. Ulaganje na ovaj način u nadarene sportiste će se pozitivno odraziti za afirmaciju naše lokalne zajednice, te uticati na popularizaciju sporta općenito.

Finansijska sredstva:

Za realizaciju ovog Pravilnika finansijska sredstva planirat će se u Budžetu Općine Stari Grad Sarajevo za narednu godinu, a javni poziv bi se raspisivao svake godine u januaru mjesecu bodovanjem rezultata iz prethodne godine.

Prijedlog Pravilnika dostavlja se Općinskom vijeću na razmatranje i odlučivanje.

Stručna obrada:

Služba za obrazovanje, kulturu, sport
i lokalni razvoj

Predlagač:
Općinski načelnik
putem Službe za obrazovanje, kulturu,
sport i lokalni razvoj